



內
外
時
報



皇室與人民 此篇大致從國風報節錄

今世各立憲國政府之待其民也。惟以法治之。皇室之待其民也。必以恩結之。故人民犯法。在政府必執法以相繩。在皇室則常略法原情。而以仁勝義。緣此之故。人民對於政府。雖有生惡感之時。其對於皇室。則無生惡感之時。君主之所以能長保其尊榮。蓋以此也。

20589

環球憲政之母。實稱英國。英國皇室之待其民。惟施澤而已。未嘗用威也。蓋英國社會上之慈善事業。常由皇室提倡之。皇室不作他事。而惟好作慈善之事。人民之愛戴之。固其宜矣。又以國會議員。為人民之代表也。許其得入禁苑。以獵鹿一頭。所謂靈臺靈囿與民共樂者。英皇有之焉。試問吾國之資政院議員。能得此殊恩否也。又豈特英國而已。若俄羅斯者。固猶帶

專制之餘餘者也。然試問俄皇所以待其民者願何如。日本建部遜吾博士。去歲遊歷俄國。依其所調查。則現俄皇所以待其人民。築有娛樂兼矯風之人民館。以為人民宴會之所。又有大育嬰院。可收容嬰兒一千五百。每一嬰兒附以一嫗母。又有所謂歷山二世小學校者。可收容生徒二千。此外尚有各種之盲啞學校。此皆由其皇室所經營。與其政府無關者也。不特此也。現俄皇舉其宮城及離宮。半開放之。許人民得入而遊觀。蓋英皇之許入禁苑以獵鹿一頭者。尚限於國會議員。若俄皇則恩及於一般之人焉。斯真能與民偕樂者也。若我國民則何有焉。有犯禁門一步者。陷於罪而已矣。安所得視上苑御林之景物。君門萬里。當官者猶有餘慨矣。而何論小民也。又不徒俄羅斯已也。試更觀日本。自去歲有無政府黨事件之發生。日皇對於人民。益思以恩結之。今歲陽曆二日。日皇憫貧民之疾病無告也。賜

20590 金百五十萬圓。以爲施藥救療之資。遂有恩賜財團濟生會之設立。三月。又因山梨縣累被水患。民力凋敝。即以皇室土地二十九萬八千二百三町七段七畝十五步。賜爲該縣之縣有財產。四月沖繩縣有暴風。民多罹災。又賜金千五百圓以恤之。二月。其神奈川縣之須馬村有火災。以一村落之小厄。亦賜金四百圓以賑之。四月。有航海學校之練習船名七寶丸者。聞因風遭難。亦賜金百圓以爲弔祭之費。夫以英俄日本諸國。其君皆汲汲焉謀施澤以結其民。而惟恐不及。然則皇室之待人民。當取何道。亦從可知矣。

夫英國爲最純全之立憲國。吾勿敢取以相比擬矣。若日俄兩國。固世所稱爲半專制之國者也。然其皇室之待其民。比吾國顧何如。夫俄皇之設育嬰院。娛樂矯風館。及各種學校。以使民得所養所致。開放其宮城離宮。以使民得所樂所安。非因其民之全輸誠愛戴。而以是爲報也。其原因實由於有虛無黨之暗殺。欲以是消滅其怨氣。返觀吾國。則近數年來。如吳樾之案。徐錫麟之案。汪兆銘之案。其謀行暗殺。實與俄羅斯之虛無黨相髣髴者也。然盈廷臣工。未聞有勸吾君以效俄羅斯皇之故事施仁義以結人心。而惟多派警察窮搜黨人。此何爲者。日本天皇之賜土地以爲民產。賜金錢以恤民災。亦非其仁民之意。數月來忽驟加優渥也。實因去歲有幸德秋水之謀反案。欲以是滅泯其餘黨。返觀吾國。則近數年來。如萍鄉之亂。欽州之亂。雲南河口之亂。

其將謀大不敬於 皇室。

與日本幸德秋水之案。亦相髣髴也。然盈廷臣工。未聞有勸吾君以效日本天皇之故事。施膏澤以固民志。而惟肆爲瓜蔓之抄。濫賞邀功之吏。此何爲者。輔相者不得其人。國家大事。有不順輿情者。則以 詔旨發布之。鎮之以刑法。平之以兵力。在朝臣工。則利用之以爲升官發財之機會。已收其利。而使怨毒盡歸於 皇室。循斯以往。則人民對於 皇室。有心日離而已矣。政府之罪。可勝誅哉。

吾敢告當道諸公曰。公等苟有一線之天良以愛戴 皇室也。則當知 皇室之對於人民。只可有恩而不可有怨。人民縱有不禮於 皇室之事。 皇室斷不可有積怨於人民之事。 皇室與人民。能保有親愛之感情。斯國內乃可長治久安。國本亦以根深蒂固。愛國忠君之事。實無有大於是者。斯則大臣應盡之責任也。非然者。不能謀上下之協和。而徒以虐政淫刑。挑撥人民。使望 皇室之惡感。斯不特爲國民之罪人。亦爲 皇室之罪人也。

美人影畫中之中國 錄神州日報

美國前駐廈門領事埃拿而特。旅華最久。熟於吾國情事。近日歸國。應加省大學之請。以影畫演說中國社會之狀況。其畫中所指陳者。多可令人太息之事。抑亦可爲吾國人之當頭棒喝也。是日埃氏到場。先演說云。中國者。其大無匹者也。人民四萬萬。土地四百萬方里。其內部十八省中。面積一百萬八千方里。